



册府元龜
卷之二十一
至二十三



13
849
10



4 3
849
10



辨府元龜

淮南李嗣京參閱

西極文翔鳳訂正

豫章黃國琦較釋

帝王部

二十一

自古受命而王者莫不有徵應焉歲起攝提肇生天
皇書契而下益童童矣故曰黃河清而聖人生里社
鳴而聖人出羣龍見而聖人用生既異稟則文王之
在母不憂出既殊感則漢高以斬蛇自負用既響合

則光武應白水之讖而中興矣傳曰天降時雨山川出雲嗜欲將至有開必先易曰雲從龍風從虎聖人作而萬物覩上自日月星辰下及昆蟲草木以時荐祉者何可勝道哉是知天人合契靈祇幽贊運之斯啓感而遂通乘時建事大勲以集蓋帝者之興未有不休徵先兆以表春命之符者也

帝堯初爲唐侯嘗夢攀天而上之

帝舜耕於歷山夢眉長與鬚等

夏禹初爲司空觀於河有長人白面魚身出曰吾河精也呼禹曰文命治滌授禹河圖言治水之事乃退

入于淵

周文王父季歷之十年飛龍盈於殷之牧野此蓋聖人在下位將起之符也及爲西伯作邑于豐文王之妃曰太姒夢商庭生棘太子發植梓樹於闕間化爲訟箱作楫以告文王文王幣告羣臣與發並拜吉夢季秋之甲子赤雀郵書及豐止于昌戶昌拜筮首授之其文要曰姬昌蒼帝子亡殷者紂
武王伐紂度孟津中流白魚躍入王舟王俯取魚長三尺目下有赤文成字言紂可伐王寫以吉字魚文消燔魚以告天有火自天止于王呈流爲赤鳥烏啣

穀焉穀者紀后稷之德火者燔魚以告天天火流下
應以吉也遂東伐紂勝於牧野兵不血刃而天下歸
之

漢高祖初從王媼武負貫酒時飲醉臥武負王媼見
其上嘗有惟高祖每酷留飲雖數倍及見惟歲竟此
兩家嘗折券棄責後高祖以亭長爲縣送徒驪山徒
多道亡自度比至皆亡之到豐西澤中亭止飲夜皆
筭縱所送徒曰公等皆去吾亦從此逝矣徒中壯士
願從者十餘人高祖被酒夜逕澤中令人行前行
前者還報曰前有大蛇當徑願還高祖醉口壯士行

何畏乃前拔劍斬蛇蛇分爲兩道開行數里醉因臥
後人來至蛇所有一老嫗夜哭人問嫗何哭嫗曰人
殺吾子人曰嫗子何爲見殺嫗曰吾子白帝子也化
爲蛇當道今者赤帝子斬之故哭人乃以嫗爲不誠
欲苦之嫗因忽不見後人至高祖覺告高祖高祖乃
心獨喜自負諸從者日益畏之高祖隱於芒碭山澤
間呂后與人俱求嘗得之高祖惟問呂后后曰季所
居上嘗有雲氣故從往嘗得季高祖又喜沛中子弟
或聞之多欲附者高祖旣入咸陽范增令人望其氣
皆爲龍成五色此天子氣故勸項籍急擊之勿失沛

公用項伯張良謀來謝得免高祖既為漢王二年項籍擊漢睢水上大破漢軍多殺士卒睢水為之不流圍漢王三市大風從西北起折木發屋揚沙石晝晦楚軍大亂而漢王得與數十騎遁去陳餘襲破嘗山王耳耳敗走曰漢王與我有故而項王彊立我我欲之楚耳公曰善說星者其氏也齊人漢王之入關五星聚東井東井者秦分也先至必王楚雖彊後必屬漢耳遂走漢又漢書載漢元年十月五星聚晉東井以歷推之從歲星也此高皇帝受命之符故客謂張耳曰東井秦地漢王入秦五星從歲星聚當以義取天下秦王子嬰降漢王於軹道漢王以屬吏寶器婦女亡所取并封公門還軍次于霸上以候諸侯與秦民約法三章民亡不歸心者可謂能行義矣天之所予也五

年遂定天下即帝位此明歲星之聚東井為秦地明效也

文帝初為代王會丞相大尉共誅諸呂使行迎代王

代王報太后計猶豫未定卜之兆得大橫龜曰兆筮曰卦卜以

荆灼龜文占曰大橫庚庚余為天王夏啟以光庚庚橫貌

其繇文也占謂其謠也先是五帝官天下老則禮賢至夏啓始傳嗣能光先君之業文帝亦襲父迹言似敬也繇音文勅切本

作籀書也謂讀卜辭代王曰寡人故已為王又何王

乎卜人曰所謂天王者乃天子也

昭帝武帝少子也毋曰趙婕妤本以有奇異得幸謂

氣者言有奇女子氣及召見及生帝亦奇異十四月

手指拳上自披之即時伸宣帝武帝曾孫在襁褓坐戾太子繫郡邸獄望氣者

言長安獄中有天子氣帝遣使者分條中都官獄繫者輕重皆殺之內謁者令郭穰夜至郡邸獄丙吉拒閉使者不得入曾孫賴吉得以全幼時居數有光耀每買餅所從家輒大饘與售同亦以是惟初昭帝元鳳三年正月泰山萊蕪山南匈匈有數千人聲民視之有大石自立高丈五尺大四十八圍入地深八尺三石爲足石立後有白鳥數千下集其旁昌邑有枯社木卧復生又上林苑中大柳樹斷枯臥地亦自立生有蟲食樹葉成文字曰公孫病已立時眚孟推春秋之意以爲石柳皆陰類下民之象泰山者岱宗之嶽

王者易姓告代之處今大石自立僵柳復起非人力所爲此當有從匹夫爲天子者枯社木復生故廢之家復生明公孫氏當復興者也孟意亦不知所在卽說曰先師董仲舒有言雖有繼體守文之君不害聖人之受命漢家堯後有傳國之運漢帝宜誰差天下求索賢人誰問差擇也問擇天下賢人禮以帝位禮古禪字而退自封百里如殷周二王後以承順天命孟使友人內官長賜上此書內官署各百官表云內官長丞初屬少府中屬主爵後屬宗正賜者其長之名也時昭帝幼大將軍霍光秉政惡之下其書廷尉奏眚孟妄設妖言惑衆大逆不道皆伏誅後五年孝宣帝

興於民間卽位徵孟子為郎宣帝初各病已

後漢光武皇考南頓君欽初為濟陽令以建平元年

十二月甲子夜生光武於縣舍有赤光炤室中欽異

焉使卜者王長占之長辟左右曰此兆吉不可言是

歲縣界有嘉禾生一莖九穗因名光武曰秀明年方

士有夏賀良者上言哀帝云漢家歷運中衰當再受

命於是改號為泰初元年稱陳聖劉太平皇帝以厭

勝之及王莽篡位忌惡劉氏以錢文有金刀故改為

貨泉或以貨泉字文為白水真人後望氣者蘇伯阿

為王莽使至南陽遙望見舂陵郭喈曰氣佳哉鬱鬱

匆匆然及始起兵還舂陵遠望舍南火光赫然屬天

有頃不見道士西門君惠李守等亦云劉秀當為天

子更始立光武為大司馬狗河北以王郎新盛乃北

狗薊晨夜兼行蒙犯霜雪天時寒面皆破裂至滹沱

河無船適遇冰合得過未畢數車而陷又王霸傳曰

郎起兵光武卽南馳至下曲陽傳聞王郎兵在後從

者恐及至滹沱河候吏還白河水流漸無船不可濟

官屬大懼光武令王霸往視之霸恐驚眾欲且前阻

水還卽詭曰水堅可渡官屬皆喜光武笑曰侯吏果

妄語也遂前北至河河水亦合乃令霸護渡未畢數

騎而水解光武謂霸曰安吾眾得濟免者卿之力也

霸謝曰此明公至德神靈之祐雖武王白魚之應無

以加此光武謂官屬曰王霸權以濟事殆天瑞也

惶惑不知所之有白衣老父在道旁指曰努力信都

郡為長安守此去八十里光武即馳赴之信都太守任光開門出迎光武安帝自在邸第數有神光昭室又有赤蛻盤於床第之間

獻帝母王美人妊娠畏何后服藥欲除之胎安不動又數夢負日而行

魏太祖之為魏王也先是熹平五年黃龍見譙光祿大夫橋玄問太史令單颺此何祥也颺曰其國後當有王者興不及五十年亦當復見天事嘗象此其應也丙黃殷登默而記之至四十五年太祖為魏王登尚在文帝初為魏王延康元年三月黃龍見譙登聞

之曰單颺之言其驗茲乎

魏書曰王召見登謂之曰昔成封聞楚丘之繇而敬

事季友鄧晨信少公之言而自納光武登以篤老服膺占術記識天道豈有是乎賜饒安田租勃海郡百戶牛

四月饒安縣言白雉見

賜饒安田租勃海郡百戶牛酒大酺三日太嘗以太牢祠

宗廟八月石邑縣言鳳凰集又郡國十三言鳳凰見二

十七言白虎見是年麒麟十見郡國

晉武帝初為中撫軍魏咸熙元年六月鎮西將軍衛瓘至於成都得璧玉卽各一枚文似成信字魏人宣示百官藏于相國府賈充聞之曰吾聞譙周之言先帝諱備其訓具也後主諱禪其訓授也如言劉已具矣當授與人也今中撫軍各炎而漢年極於炎興瑞

出成都而藏之于相國府此殆天意矣是歲拜充為梓潼太守明年八月嗣相國晉王位是月長人見於襄武長三丈告縣人王始曰今當太平初張掖郡刪丹縣金山玄川溢涌寶石負圖狀象靈龜廣一丈六尺長一丈七尺一寸圍五丈八寸立于川西有石馬七其一仙人騎之其一羈絆其五有形而不善成有玉匣關蓋於其前上有玉字玉玦二璜一麒麟在東鳳鳥在南白虎在西犧牛在北馬自中布列四面色皆蒼白其南有五字曰上上三天王又曰述大金大討曹金但取之金立中大金馬一匹在中大吉開壽

此馬甲寅述水九中字六金字十又有若八卦及列宿孛彗之象焉

搜神記曰初漢元成之世先識之士有言曰魏年有和當有開石於西三千餘里擊五馬文曰大討曹及魏之初興也張掖之柳谷有開石馬始見於建安形成於黃初文備於太和周圍七尋中高一仞蒼質素章龍馬麟鹿鳳凰仙人之象燦然咸著此一事者魏晉大興之符也至晉太始三年張掖太守焦勝上言以留郡本國圖較今石文文字多少不同謹具圖上按其文有五馬象其一有人平上憤執戟而乘之其一有若馬形而不成其字有金有合有中有大司馬有王有大吉有正又有開壽其一成行曰金當取之漢晉春秋曰氐池縣大柳谷日夜激波湧溢其聲如雷曉而有蒼石立水中長一丈六尺高八尺石盡文為十三馬一牛一鳥八卦玉珎之象皆隆起其文曰大討曹適水中甲寅帝惡其討也使鑿去為計以蒼石室之宿昔而白石滿焉至晉初其文愈明象皆煥徹如玉焉

懷帝初誕有嘉禾生於豫章之南昌先是聖氣者云
豫章有天子氣其後竟以豫章王爲皇太弟

元帝以晉王卽位始秦時聖氣者云五百年後金陵
有天子故始皇東遊以厭之改其地曰秣陵壅北山
以絕其勢及孫權之稱號自謂當之孫盛以爲始皇
建於孫氏四百三十七載考其歷數猶爲未及帝之
渡江也乃五百二十六年真人之應在於此矣初有
玄石圖有牛繼馬故宣帝初忌牛氏遂爲二楹共一
口以貯酒焉帝先飲者佳而以毒酒鴆其將牛金而
恭王妃夏侯氏竟通小吏牛氏而生元帝咸寧初風

吹大社樹折社中有青氣占者以爲東莞有帝者之
祥繇是徙封東莞王於瑯琊卽帝祖武王也及吳之
亡王濬實先至建鄴而皓之降款遠歸璽於瑯琊天
意人事又符中興之兆帝初鎮建業郭璞爲王導叅
軍導令璞筮之遇咸之井璞曰東北郡縣有武名者
當出鐸以著受命之符西南郡縣有陽名者井當沸
其後晉陵武進縣人於田中得銅鐸五枚柄口皆有
龍虎形又有將雛諸雀集其前皆驅去復還至於再
三又有鵝三四頭高飛且鳴周迴東西晝夜不下如
此者六七日豫章有大樟樹大三十五圍枯死積久

永嘉中忽更榮茂又歷陽縣中井沸經日乃止及帝
爲晉王又使璞筮遇豫之睽璞曰會稽當出鐘以告
成功上有勒銘應在人家井泥中得之錄辭所謂先
王以作樂崇德殷薦之上帝者也及帝卽位大興初
會稽郟縣人果於井中得一棧鐘長七寸二分口徑
四寸半上有古文奇書十八字云會稽微命餘字時
人莫識之樸曰蓋王者之作必有靈符塞天人之心
與神物合契然後可以言受命矣觀五鐸啟號於晉
陵棧鐘告成於會稽瑞不失類出皆有方豈不備哉
若夫鐸發其響應微其象器以數臻事以實應天人

之際不可不察初武帝伐吳琅琊武王伸率衆出塗
中而王渾逼歷陽王濬已次近路孫皓欲降送天子
璽授近越二將而遠送詣伸識者咸惟之吳之未亡
也吳郡臨平湖一旦自開湖邊得石函中有小青石
刻作皇帝字舊言臨平湖塞天下亂開則天下太平
吳人以爲美祥俄而吳滅後帝興於江左

康帝初爲吳王成帝咸和六年五月曲阿有柳樹倒
地六載是月忽復起生九年五月甲戌吳雄家有死
榆樹是日因風雨起生與漢上林斷柳起生同象時
雖改封琅邪而猶食吳郡爲邑是帝起體饗國之象

也曲阿先亦吳地象見吳皆天意也

孝武帝始四歲時哀帝興寧三年五月廬陵西昌縣
修明家有死栗樹是日忽起生及得位垂統識者竊
曰西昌修明之祥帝諱實應之矣

孝武諱曜
字昌明

是與漢

宣帝頗同象也

後魏道武初生于參合陂明年有榆生于埋胞之坎
後遂成林帝既爲代王登國六年十二月出獵親獲
鹿一角召問群臣皆曰鹿當二角今是諸國將并之
應也

天興元年遂卽皇帝位初聖武帝諱詰汾嘗率數萬
騎田於山澤歛見輜輶自天而下既至見美婦人侍
衛甚盛帝異而問之對曰我天女也受命相遇遂同
寢宿旦請還曰明年同時復會此處言終而別去如
風雨及期帝至先所田處果復相見天女以所生男
授帝曰此君之子也善養待之子孫相承當世爲帝
王語訖而去子卽始祖神元帝諱力微也故時人謗
曰詰汾皇帝無婦家力微皇帝無舅家天興四年新
興太守上言晉昌民賈相昔年二十二爲雁門郡吏
入句注西涇見一老父謂相曰自今以後四十二年
當有聖人出於北方時當太平子孫永長吾不及見

之言終而過相顧視之父老化爲石人相今七十下
檢石人見存至帝破慕容寶之歲四十二年

後周太祖其先普廻因符得玉璽三紐有文曰皇帝
璽普廻異之以爲天授後太祖爲夏州刺史嘗從數
騎於野忽聞蕭鼓之音以問從人莫之聞也賀拔岳
爲侯莫陳悅所殺太祖遂奄有其衆初岳營於河曲
有軍吏獨行忽見一老翁鬚眉皓素謂之曰賀拔岳
復據有此衆然無所成當有一字文家從東北來後
必大盛言訖不見此吏嘗與所親言之至是方驗
隋高祖初生有左來自河東謂皇妣曰此兒所從來

甚異不可俗間處之將高祖舍於別館躬自撫養皇
妣嘗抱高祖忽見頭上角出徧體鱗起皇妣大駭墜
高祖於地左自外入見曰已驚我兒致令晚得天下
至周武帝時定州城西門久閉不開齊文宣帝時或
謂開之以便行路帝不許曰當有聖人來啓之及隋
高祖至而開焉莫不驚異

唐高祖初仕隋爲譙隴刺史善相者史良言於高祖
曰公骨法非嘗必爲人主至於命也非所敢知久之
史良復遇高祖乃大驚曰骨法如舊年壽之相頓異
昔時勿忘鄙言願深自愛高祖心益自負及爲殿內

少監時尚食奉御郭弘道善相高祖善之弘道因言曰公天中伏犀下接於脊此非人臣之相宜深自愛高祖取弘道銀盆置之於地引弓射之謂弘道曰何言有驗當一發中之既發應弦而中弘道曰願公事驗之日賜賞金盆高祖大悅後爲太原留守鎮并州時武士護爲司鎧參軍事詰朝嘗於街內獨行聞空中有人言曰唐公是天子士護尋聲不見有人乃以此白高祖并進兵書高祖悅之曰幸勿多言兵書禁物尚能將來深識好心當同富貴耳其夜士護夢高祖乘馬上天旦以狀聞高祖大悅於是出入卧内委

以心腹大業十三年起義兵於太原五月甲子慶雲見甲戌有白鳥飛入高祖之懷七年丙辰師次霍邑隋武牙郎將宋老生陳兵拒險義師不得進屯軍於賈胡堡會霖雨積旬餽運不給高祖患之忽有白衣老父詣軍門請見曰予霍山神遣語大唐皇帝若何霍邑當東南傍山取路八月雨止我當助爾破之高祖初哂之遣人東南視地果有微道高祖笑曰此神不欺趙襄子豈當負吾耶時有訛言云突厥將襲太原又軍糧且盡高祖命旋師太宗切諫乃止八月己卯雨果霽高祖大悅以太牢祭霍山庚寅次古堆去

絳郡二十餘里有紫雲如華蓋樓闕之形正臨高祖之上癸巳次龍門縣河水變清白狐見十一月丙辰入京師尊代王為天子改元義寧元年高祖為唐王義寧二年二月辛卯安邑白鹿見甲午河池言慶雲見三月丙辰高祖汎舟於後池有魚二躍入舟乙丑趙郡公孝恭獻神龜背上有文曰萬國付其代代樂武德六年七月車騎將軍劉山濤上書高祖龍潛時數往來雜交之莊舍踐二石靴迹見於石中至今猶在高祖令鑿之深寸餘其迹愈明乃止

初隋大業中子洪水繞揚山煬帝疑李氏有受命之符故誅李金故李密據維口倉欲其庶識隋文時自長安故城東

南移於唐興村置新都令西內承天門正當唐興村門今有大槐樹柯葉森鬱即村門樹也有司以行列不正將去之帝曰高穎嘗坐其下不可去也

太宗文皇帝以隋開皇十八年歲次戊午生於武功之別館初太宗在孕而語聲達於外后心異之將誕育后不之覺而太宗已生時有慶雲見瀟漫數里止屬於天二龍戲於門外水中經三日乃冲天而去見者驚焉大業十三年望氣者云龍門有天子氣連太原甚盛故煬帝置離宮數遊汾陽宮以厭之至是太宗稱述此事以白高祖既舉義師旦日太宗所居處有紫雲當其上俄變為五色狀如飛龍武德八年拜

中書令嘗夜於嘉猷門側見一神人長數丈素衣冠呼太宗進而言曰我當令汝作天子太宗再拜忽因不見所居弘義宮中有一大池嘗作佳氣鬱然高數百尺太宗心獨異之至九年其氣轉盛上屬於天六月癸未克定內難立爲皇太子萬機巨細皆令取決初太宗爲秦王高祖制詩云聖德合天地五宿連珠見和風拂世民上下同歡宴帝於宮西造宅初成高祖送玉璽以至帝所縉紳先生相謂曰詩及玉璽蓋奉國之祥瑞者歟又有方士喬伏仁善言符命見建成元吉俱有爭心因謂所親曰秦王應天上錄當爲

元君此二人乃驅除耳果如其言卽隱海陵之未發也太史奏云太白入南斗秦王得天下其鋒不可當自非皇天眷顧何以臻此

高宗初爲晉王貞觀十七年太子承乾得罪廢爲庶人次當立者濮王太宗以晉王仁壽又以太原瑞石文云李治萬吉乃與長孫無忌房玄齡李勣褚遂良等定計立爲皇太子

睿宗初生於含涼殿則天乃於殿內造佛事有玉象焉及長遊觀其側玉象忽言爾後當爲天子

玄宗初爲臨淄郡王景龍三年出爲潞州別駕境有

黃龍白日上升天又觀事之際吏咸見赤龍據案嘗
出咬有紫雲在其上從者望而奇之四年來朝京師
將行使術士韓禮筮有一著孑然獨立禮驚曰策立
其瑞非嘗之事也貴不可言既行所過之處大人迹
見州人皆異之先是帝所居宅外有池水浸溢頃餘
望氣者以爲龍氣是年四月中宗幸其第因遊其池
結絲爲樓船令巨象踏之及平內難日寅時潞州聞
空中語曰臨淄王誅韋庶人相王得天下吏驚走遠
白于刺史以椽吏狂言留繫旬日會制到乃捨之帝
自至潞州日抱戴月皇輪嘉禾合穗李樹連理等凡

十有九瑞

開元二年六月左拾遺蔡孚獻龍池集王公卿士以
下凡百二十篇請付太嘗寺其辭合音律者爲龍池
樂章以歌聖德從之初帝在藩與宋王等居于興慶
里時人謂爲五王子宅及景龍末宅內成池湧出泥
漚清瑩流之不竭中有龜龍遊焉故羣臣歌之八年
鄭州人元承徵上封事曰謹按魏典及北齊至後魏
太平真君年中內學者奏言上黨有天子氣在壺關
大王山于時太武南巡親幸上黨掘山封石將以厭
之亦猶秦始皇東遊望氣者云五百年後金陵有天

子氣始皇乃改金陵爲秣陵塹北山以絕其勢孫權僭號吳人以爲當之孫盛晉陽秋云從始皇東遊之歲至孫權僭號之時中間四百三十七年數權未當應及晉元帝南渡始有五百二十六年以彼金行奄居四海金陵之瑞其在茲乎又按太武之後百有餘年高歡以內學之言復欲妄干符命因勒兵馬來在晉陽舍於壺關六旬而去更有上黨百姓從在晉陽因名上黨之坊實曰晉陽之地歡又居此僞以應之論其僭應則高歡不異於孫權語以虛攘則太武有同於嬴政暗于時運豈不惜哉臣等恭尋符命壺關

天子之氣正是陛下當焉玄穹上卷符命下鍾故使歷試潞州所以用當其應此天意也豈人事乎然而一幸潞州三移灰琯壺關之地歲時爲蒐狩之場大王之山朝夕卽豫遊之所始能龍潛上黨尋乃鳳舉咸寧內學之言果合符契又按內學所奏符應年月太平真君太平則叶今辰真君則更明陛下自唐至魏三百餘年觸類而推無不驗應伏願陛下上承天意下諭人心昭告寰瀛編列國史從之

肅宗初爲皇太子天寶十三載觀安祿山有悖逆之狀恐危宗廟遂精誠祈夢其夜夢故內侍普寂等二

人昇一紫案覆以黃帕自天而下直至帝前素版丹書文字甚多既寤所記者維四句曰厥不云乎其惟其時上天所保福祿不虧十五載六月玄宗幸蜀帝幸靈武次永壽縣雲氣見西北長數丈成橋閣之狀識者以爲天子氣自是紫雲擁帝所乘馬聚散不時至平涼都路傍遇一伏兔命左右索弓箭因謂左右曰吾若破賊射則中之不然則否一發而斃左右咸稱萬歲帝初發平原有雲彩見空白鶴前引出軍之後有黃龍自帝所憇屋騰空而去後於彭原郡受冊太上皇下誥曰間者日抱帶赤雀白狼之瑞接武薦臻此皆皇帝聖敬之符孝友之感也

憲宗自廣陵郡王冊爲皇太子時順宗卽位已久而臣下未有親奏對者內外咸言王侄王叔文專行斷決日有異說又屬頻陰雨皆以爲羣小用事之應及將行冊禮之夕雨乃止至行事之時天景晴朗有慶雲見識者以爲天意有所歸

宣宗初封光王十餘歲時遇重疾沈痾忽有光曜燭身灑然而興正身異揖如對臣僚乳媪以疾聞穆宗往視之撫其手曰此吾家英物非心憊也賜以玉如意御馬金帶嘗夢乘龍升天言之於鄭太后乃曰此

不宜人知幸勿復言

懿宗初封鄆王嘗經重疾郭淑妃侍醫藥見黃龍出入臥內既間妃以異告帝曰慎勿復言又嘗大雪數尺而帝寢室之上獨無人皆異之大中末年京城小兒摺布蘸水向日張之謂之振暈又宣宗曾製奏邊陲曲撰詞云海岳宴咸通至是帝以鄆王卽位改元咸通書皆驗

昭宗卽位前一日於宅所居之邨東垣有紫氣二條若成文字俄於氣生之處發其垣獲金龍子一枚諸王及左右咸共觀見及聽政頒示百官

後唐武皇初爲太原節度使以昭宗景福二年十二月狩於近郊獲白兔有角長三寸

莊宗初嗣晉王時長柳巷田家有桃樹伐已經年舊坎仍在其仆木一朝屹然而起行數十步復於舊坎其家驚駭蒼黃散走議者以漢昭帝時上林仆木起立生枝蟲蠹成文而宣帝興今木理成文仆而重起亦李氏中興之符也又天祐十七年幽州人於田中得金印文曰關中龜卽李紹宏使人送於行臺議者曰關中列聖所都龜者卜年之物符璽傳授之器墮落在田乃今復見蓋王者受命之符也十八年正月

魏州開元寺僧傳真獲傳國寶一送於行臺傳真之師於廣明中遇京師喪亂得之緘秘已四十年篆文古體人不識之唯以珍物秘藏非以爲國璽也興建初法物司收市寶玉傳真將鬻之玉人識而嘆曰國寶之一也何至於斯傳真且喜送於行臺帝出之以示諸將驗其文卽受命八字也光彩瑩曜希世罕工羣僚諸將奉觴稱賀帝曰天祚有德錫之神器願于眇末何敢當之止於緘藏俟其真人耳二十年正月丙子朔五臺山僧獻銅鼎二枚每容二斗言於山中石崖隙裂得之形器古異識者以爲中興之瑞按西漢哀平之間扶風王延年獲銅鼎二枚赤色有光後光武誅新莽中興漢室鼎者帝王重器以異爲瑞不必貢金九牧質重萬鈞以爲異也

明宗初在太宗左右嘗廵邊宿於鴈門逆旅逆旅媪方娠帝至媪慟不時具食腹中兒謂母曰大家至速宜具食聲聞於外媪異之遽起親奉爨敬事尤謹帝曰媪前倨後恭詰之曰公貴不可言也問其故具道娠子腹語事帝曰慢媪遜言懼于辱耳同光末自鄴廻趨白臯渡將濟以度船甚少帝方憂之忽有木機數隻沿流而至卽用以濟師故無留滯焉

末帝初在太原嘗與晉高祖因擊毬同入趙襄子之廟見其塑像屹然起立帝私心自負及爲護國軍節度使一日夢明宗召至寢門與宋王各剃頭而退及寤以問賓吏皆無對者時雨池擢鹽推官李專美在坐屏人謂帝曰將來嗣主必明公也帝心喜之又帝在岐陽日有前爲判獄吏何叟者失其名年踰七十暴卒於家見一人爲何曰陰府召君何隨之至一公宇甚宏敞有吏憑几戒何曰召汝無他事爲吾言於潞王來年三月當爲天子善自愛也及蘇密告帝親要慮其妄誕不敢言月餘復卒陰官見而叱曰汝安得

違吾旨不達其事何具陳爲左右所阻陰官曰且放汝還可速言之何退見廊廡下有簿書狼籍以問主者曰此朝代將改升降人爵之籍也及再蘇謁劉延朗密道其事帝屏人召何入問謂曰爾雖有憑吾無以信何曰某衰老若此唯有一子請大王質之如無驗可殺之又張濛岐州之瞽者自言知術數不龜不著言是太白山神其神祠元魏時崔浩廟時事否泰人之休咎濛告於神卽傳吉凶之言房嵩泥於事神酷信之帝在岐陽嵩引濛謁見聞帝語聲駭然曰非人臣也令嵩詢其事卽傳神語曰三珠併一珠驢馬

没人驅歲月甲庚午中興戊巳土嵩請曰神言予不知也長興四年五月府廨諸門無故自動人頗駭異遣嵩問濛濛見嵩來未交言先問嵩衙署小異勿恠不出三日有恩命其夜報至封潞王及帝被疑除鎮甚恐再三質濛初濛曰且爲備王保無患及王恩同兵將至又召濛謂之曰爾言無患今天下兵來萃我城下內無兵食外無援助得無患乎濛曰王有天下不能獨立朝廷兵來迎王也王若疑臣臣惟一子未及冠請王致之麾下以質臣心及帝入雒受太后冊曰御明堂宰相讀冊文維應順元年歲次甲午四月

庚午朔帝廻視房嵩曰張濛神言甲庚事不亦異乎帝令嵩共術士解三珠一珠事言三珠三帝也驢馬無人驅失主也又帝在岐時有人已死復生言帝必登大位二十三年好事者附其意言帝小字二十三又云潞字一足入雒時石壕人胡呆通會天文帝亦召問之曰王至貴不可言若有舉動宜以乙未年及舉兵又問曰今歲曆法名陰部首王者不宜建功立事王且挾今主俟來歲入朝則福祚永遠帝姓王氏真定房山人也邑南三里里墅名曰王子則所生之地地稱王子亦有符焉既卽位以族兄爲令

訪名未獲守

先舊廬植松檟以爲墳園其側有古佛剎剎有石像忽搖動不已人駭而告令令趣之復爾時甚異焉

晉高祖初爲河東節度後唐末帝出師重圍晉陽帝遣心腹何福單騎求援北蕃蕃王自將諸部赴之不以繒帛不以珠金若響應聲謂福曰吾已兆於夢皆上帝命我非我意也時援兵未至唐將張敬達引軍逼城設柵柵將成忽有大風雨暴起柵無以立後築長連城城欲就又爲水潦所壞城竟不能合晉陽有北宮宮城之上有祠曰毗沙門天王帝曾禁修黠而禱之經數日城西北闌正受敵處軍候報稱夜來有

一人長丈餘介金執戈行於城久方不見帝心異之又牙城有僧坊曰崇福坊之廡下西北隅有泥神神之首忽一日有煙生其騰郁如曲突之狀坊僧奔赴以爲人火所延及俯而視之無所有焉事尋達帝帝召僧之騰高者問焉僧曰貧道見莊宗將得天下魯有此煙觀其噴湧甚於當時可知矣自此日傍多有五色雲氣如蓮芰之狀帝召占者視之謂曰此驗應誰占者曰見處爲瑞更應何人又帝每詰旦使人慰撫守陴者率以爲常忽一夕已暝城上有號令之聲聲不絕者三帝使人問之將吏云從上傳來人皆知

其神助時城中忽有數處井泉暴溢不止及蕃軍大至合執破唐師之衆如拉朽焉斯天運使然非人力也先是朱梁改元之始卽天祐之四年也潞州行營使李思安奏壺關縣庶穰鄉鄉人伐樹樹倒自分兩片內有六字如左書云天十四載石進梁主藏於武庫時遣詞臣李琪答詔嘉其瑞焉然莫詳其義至帝卽位人以爲雖有國姓計其甲子則二十年有奇矣議者曰天字取四字中兩畫加之於旁則丙字也四字去中之兩畫加十字則市字也帝卽位之年乃丙中也又易云晉者進也國號大晉皆符契焉又卽位

之前一年年在乙未鄴西有柵曰李固清淇合流在其側柵有橋橋下大鼠與蛇鬪鬪及日之中蛇不勝而死行人觀者數百識者志之後唐末帝果滅於申少帝初爲金吾上將軍天福三年從高祖幸大名其年天旱高祖遣祈雨白龍潭焚請未罷有白龍見於潭心是日澍雨尺餘人甚異之

漢高祖初仕爲河東兵馬使嘗因事至代北遮虜軍路側有唐衛公李靖祠遇戍卒乘酒以索戲繫其神之頸卒尋致殞時戍長邑老玄陳祈禱以解之而了無應驗帝乃爲祝曰公本朝名將精爽在天雖庸輩

褻瀆誠當其責而人既有請良可恕焉因焚香致拜
 卒者俄蘇傳其神語曰此非大貴人救不可免也聞
 者神其事後為河東節度使天福十一年天下水太
 原葭蘆茂盛最上一葉如旗狀皆南指焉明年遂即
 帝位

隱帝始高祖鎮太原周太祖握蕃漢兵要嘗侍帳中
 參決戎政時令少帝監符璽頗相戲狎暨從征鄴城
 旦夕同侍一日詰旦語太祖曰我夜來夢爾為驢負
 我昇天既捨爾乘俄變為龍捨我南去何祥也笑而
 言曰公為驢作少意智勿空見玩撫掌而罷為左衛

大將軍高祖欲改年號中書進擬乾和二字高祖改

為乾祐與帝名相符

乾祐帝名

帝微有風痰每連唾不止

目多閃掣即位之始遽無恙

周太祖微時嘗晝寢有如小虺五色出入顴鼻之間
 柴后遽見愕然始奇特之傾資無惜后恐人騰口貽
 患每寢戒左右俾於屏蔽之所在太原時有神尼同
 姓見太祖謂李瓊曰我宗天上大仙當為世界主瓊
 詰其故曰頂上有肉角也

後唐清泰末時所居官舍之鄰吳氏有青衣佳娘者
 為山魃所魅鬼能人言而投瓦石隣伍恐悚無敢過

吳氏之舍而性剛者強詣必瓦石交下太祖聞而遇
之言笑侮戲移時寂然如是者再太祖去鬼言如故
或謂鬼曰爾既神聖向者客來又何寂然鬼曰向來
者大人也繇是軍中大異之及爲樞密使北征率師
如澶淵旭旦日邊有紫氣來當太祖馬首之上高不
及百尺從官視而異之至鄴都一夕在山亭院齋忽
有黃氣起于前繚繞而上遽際于天太祖於黃氣中
仰見星文紫微文昌燦然在目駭曰予在室中而見
天象不其異乎密告知星者乃拜賀曰坐見天衢物
不能隔至貴之祥也異日又於衙署中紫氣起於幃

竿龍頭之上凡二日觀者異之及討李守貞於河中
帝嘗於東砦大陳師旅鉦鼓錚鞞旗幟光耀守貞登
陣下瞰氣色不懌獨言曰是何妖變後城中人言見
太祖軍上有紫氣如樓閣華蓋之狀故也

册府元龜

册府元龜

帝王部

卷之二十一

二十六

冊府元龜

淮南李嗣京叅閱

西極文翔鳳訂正

豫章黃國琦較釋

帝王部

二十二

符瑞

傳曰麟鳳五靈王者之嘉瑞也夫德之休明天降茂
祉則必百神幽贊庶物效靈故有非人力之所能致
而自至焉者先民有言曰人主和德於上百姓和合
於下則天下之和應矣故嘉禾興朱草生記曰天不

愛其道地不愛其寶蓋珍符之應以應有德故王者重之是以書載歸禾詩咏鳴鳳芝房寶鼎升於樂府神雀甘露標為年紀皆所以發揚景貺光昭丕烈者也然而洪覆在上其道玄遠坤厚載物其德沉潛人靈歆乎至和昆蟲蒙乎利澤非布於備兆震乎珍物又安能發輝眷祐而覺悟黎蒸者哉

太昊伏羲氏受龍圖畫八卦有景龍之瑞
炎帝神農氏致大火之瑞嘉禾生醴泉出
黃帝軒轅氏有土德之瑞故號黃帝天下既定聖德光被羣瑞畢臻有屈軼之草生於庭佞人入朝則草

指之是以佞人不敢進有景雲之瑞有赤方氣與青

方氣相連赤方中有兩星青方中一星凡三星皆黃

色以天晴明時見於攝提名曰景星

一云景星見形如半月可以夜

作黃帝黃服齊于中宮坐于玄扈雒水之上有鳳凰

集於東園或巢於阿閣或鳴於庭其雄自歌其雌自

舞麒麟在囿神鳥來儀有大螻如羊大螾如虹黃帝

以土氣勝遂以土德王五十年七月庚申天霧三日

三夜晝昏黃帝問天老力牧容成曰於公何如天老

曰臣聞之國安其主好文則鳳凰居之國亂其主好

武則鳳凰去之今鳳凰翔於東郊而樂之其鳴音中

夷則與天相副以是觀之天有嚴教以賜帝帝勿犯也乃召史卜之龜焦史曰臣不能占也其問之聖人帝曰已問天老力牧容成矣史北面再拜曰龜不違聖智故焦霧除游于雒水之上見大魚殺五牲以醮之天乃甘雨七日十夜魚流於海得圖書焉龍圖出河龜書出雒赤文篆字以授軒轅軒轅接萬神於明庭今寒門谷口是也又獲寶鼎帝南巡狩至於東濱澤獸出能言達萬物之情

少昊金天氏登帝位有鳳凰之瑞

帝嚳高辛氏代高陽氏王天下使鼓人拊鞀擊鐘鳳凰鼓翼而舞

帝堯在位七十年景星出翼鳳凰在庭朱草生嘉禾秀甘露潤醴泉出日月如合璧五星如連珠厨中自生肉其薄如箠搖動則風生食物寒而不臭名曰箠脯又有草夾階而生月朔始生一莢月半而生十五莢十六日已後日落一莢及晦而盡月小則一莢焦而不落名曰蓂莢一曰歷莢

帝舜卽位蓂莢生於階鳳凰巢於庭擊石拊石百獸率舞景星出房地出乘黃之馬西王母獻白環玉玦舜命禹平水土四海之內咸戴帝舜之功於是禹乃

興九韶之樂致異物鳳凰來翔天下明德自虞帝始
 夏禹卽天子之位雒出龜書六十五字是爲洪範此
 謂雒出書者也禹南巡狩濟江中流有二黃龍負舟
 舟人皆懼禹笑曰吾受命於天屈力以養人生寄也
 死命也奚懼龍哉龍於是曳尾而逃禹卑宮室盡力
 溝洫百谷用成龍女降
 湯有神牽白狼啣鈎而入商朝金德將盛銀山自溢
 周武王卽位天下歸之周德旣隆草木茂盛蒿堪爲
 室因居蒿宮

成王時周公旦攝政七年制禮作樂祥鳥鳳凰見冀
 莢生乃與成王觀於河雒沈璧禮畢王退俟至于日
 昧榮光並出黃河清慶雲至青龍臨壇啣玄甲之圖
 坐之而去禮于雒亦如之玄龜青龍蒼兕至于壇背
 甲刻書赤文成字周公授筆以世文寫之書成文消
 龜墮甲而去其言自周訖于秦漢盛衰之符麒麟遊
 苑鳳凰翔庭成王援琴而歌曰鳳凰翔兮於紫庭余
 何德兮以感靈賴先王兮恩澤深于膏樂兮民以寧
 周公東征諸侯咸服宗周天降祉福唐叔得禾異畝
 同穎一作穗穎
卽穗也獻之成王成王命唐叔以餽周公於
 東土作餽禾周公旣受命禾嘉天子之命作嘉禾後魏

書靈徵志曰成王時治政太平黑狐見

穆王征西戎得四白狼白鹿

漢文帝十五年春黃龍見於成紀又日中有王字

景帝時會稽人朱仲獻三寸四寸珠明月珠王者不殺鱗介之物則

出

武帝元狩元年十月郊雍獲一角獸若麋然麋鹿屬也形似

麋牛尾一角有司曰陛下肅祗郊祀上帝報享錫一角獸

善麟云於是以薦五時時加一牛以燎賜諸侯白金

以符應合于天也

元鼎元年汾陰巫錦錦巫名為民祠魏睢后土營旁魏

魏國也汾睢本魏地之境故見地如鉤狀把視得鼎

把謂手把土也鼎大異於眾鼎文縷無款識款刻也惟之言識記也

吏吏告河東太守勝勝以聞天子使驗問巫得鼎無

姦詐廼以禮祠迎鼎至其泉從上行薦之以鼎從行其泉將薦

之至中山宴温有黃雲焉三輔謂日晴霽為宴宴而温乃有黃雲故為異也中

讀日仲即今雲陽之中山也下雲合茲中山亦同也有鹿過帝自射之因之以

祭云至長安公卿大夫皆議尊寶鼎天子曰間者河

溢歲穀不登故巡祭后土祈為百姓育穀今年豐稔

未報鼎曷為出哉稔美也稼穡美也未報者獲年豐而未賽也一日雖祈穀而未獲年

豐之報也張敞引此詔文云穀曠失報曠者少也有司皆言聞昔泰帝與神

鼎一 泰帝者即太 一者一統天地萬物所繫象也黃

帝作寶鼎三象天地人禹收九牧之金 九牧九州之牧也 鑄

九鼎象九州皆嘗觴享上帝鬼神 以享祀上帝也觴享者一也觴享齋

而祀也韓詩采蘋曰 其空足曰鬲 足中空不實者各之曰鬲也 以

象三德 三德一曰正直二曰剛克三曰柔克事見周書洪範 饗承天祐 祐福也 夏

德衰鼎遷于殷殷德衰鼎遷于周周德衰鼎遷於秦

秦德衰宋之社亡鼎廼淪胥而不見周頌曰自堂徂

基自羊徂牛萬鼎及萬不吳不敖胡考之休 周絲衣之詩基

門塾之基昇絕大者謂之塾圍鼻上謂之龕龕吳驩譁也考壽也休美也言報祭祀者或升堂室或升門塾祝牛羊之牲及舉大小之鼎告其致祭神降之福故獲壽考之美曰何壽之美者漢之言也 今鼎

至其泉以光潤龍變承休無疆合茲中山有黃白雲

降 言鼎至其泉之後光潤變見若龍之神能幽明能小大乘此休福無窮竟也有黃白雲降與初至中

山黃雲之瑞相合也 蓋若獸之為符 言其泉之雲又若獸形以為符瑞也 路弓乘

矢集獲壇下 路大也四矢曰乘又於壇下獲弓矢之應 報祀大亨惟受命

而帝者心知其意而合德焉 高祖受命知之宜見於其廟也合德謂與天

合 德 鼎宜視宗禰廟臧於帝庭以合明應 視讀曰示宗謂先帝有德

可尊者也禰父廟也 制曰可時又有芝草生其露殿

房中天子為塞河興通天臺若有光云 為塞河及造通天臺而有

神光之應欲 廼下詔其泉房中生芝九莖赦天下毋

令復作

冊符元龜 帝王部

元封二年六月詔曰甘泉宮內中產芝九莖連葉上帝博臨不異下房言天廣臨不以下房為幽賜朕弘

休其赦天下賜雲陽都百戶牛酒作芝房之歌

四年三月祠后土詔曰朕躬祭后土地祗見光集于

靈臺燭謂夜三燭燭也幸中都宮殿上見光其赦汾陰

夏陽中都死罪以下

六年三月詔曰朕禮首山昆田出珍物化或為黃金

祭后土神光三燭其赦汾陰殊死以下

太初三年二月行幸東海獲赤鴈

後元元年二月詔曰朕郊見上帝巡守北邊見羣鶴

留止以不羅罔靡所獲獻時春也非用罔羅時故無所獲也薦于泰

時光景並見其赦天下

昭帝始元元年二月黃鵠下建章宮太液池中黃鵠大鳥

舉千公卿上壽

三年十月鳳凰集東海遣使者祠其處三年中鳳凰北下東海

西樂

宣帝本始元年五月鳳凰集膠東千乘

二年六月尊孝武廟為世宗告祠世宗廟日有白鶴

集後庭以立世宗廟告祠孝昭寢有雁五色集殿前

西阿築世宗廟神光興於殿旁有鳥如白鶴前赤後

青神光又興於房中如燭狀廣川國世宗廟殿上有鐘音房戶大開夜有光殿上盡明

四年五月鳳凰集北海安丘淳于二縣皆屬北海

地節二年四月鳳凰集魯羣鳥從之

元康元年三月以鳳凰集泰山陳留甘露降未央宮

赦天下徒

四年三月神爵五彩以萬數集長樂未央北宮高寢

甘露泰畤殿中及上林苑

神爵元年三月幸河東祠后土有神爵集詔曰迺元

康四年嘉谷玄稷降于郡國玄稷黑粟也神爵仍集金芝

九莖產于函德殿銅池中函德殿名也銅池承露也以銅為之九真獻

奇獸駒形鱗色牛角仁而愛仁南郡獲白虎威鳳為寶朕之不明

震于珍物飭躬齋精祈為百姓東濟太河天氣清淨

神魚舞河幸萬歲宮神爵翔集汾陰有萬歲宮其以五年為

神爵元年

二年正月乙丑鳳凰神爵甘露降集京師羣鳥從以

萬數

四年二月詔曰迺者鳳凰甘露降集京師嘉瑞並見

修興泰山五帝后土之祠祈為百姓蒙祉福鸞鳳萬

舉飛覽翔翔集止於旁齋戒之暮神光顯著薦鬯之

夕神光交錯或見于天或登于地或從四方來集于壇上帝嘉嚮海內承福其赦天下十月鳳凰十一集杜陵十二月鳳凰集上林

五鳳三年三月行幸河東祠后土詔曰朕飭躬齊戒郊上帝祠后土神光並見或興于谷燭燿齋宮十有餘刻甘露降神爵集鸞鳳又集長樂宮東闕中樹上

門外闕樹行馬之裏樹也飛下止地文章五色留十餘刻吏民並觀其赦殊死以下

甘露元年四月黃龍見新豐

二年正月詔曰乃者鳳凰甘露降集黃龍登興醴泉

滂流枯槁榮茂神光並見咸受禎祥其赦天下

三年二月鳳凰集新蔡羣鳥四面行列皆向鳳凰立以萬數

黃龍元年二月黃龍見廣漢郡

成帝鴻嘉元年冬黃龍見真定

永始二年二月龍見於東萊

四年正月行幸甘泉郊泰畤神光降集紫殿

元延四年三月甘露降京師

平帝元始元年正月越裳重譯獻白雉一黑雉二

後漢光武建武二年野谷旅生麻菽尤盛野蠶成蠶

於山阜人收其利焉 先是王莽末天下旱蝗黃金一斤易米一斛

十二年夏甘露降南行唐 縣名屬常山郡 六月黃龍見東阿

今濟州縣

十三年九月南越獻白兔

十七年十月有五鳳凰見於潁川之郟縣 郟今郟城縣也東觀

記曰鳳高八尺五彩羣鳥並從行列蓋地數頃停一十七日

中元元年五月京師醴泉湧出飲之者痼疾皆愈惟

眇蹇者不瘳又有赤草生於水崖 赤草朱草也朱草日生一葉至十五

日以後日落一葉周而復始 郡國頻上甘露羣臣奏言地祇靈應

而朱草萌生孝宣帝每有嘉瑞輒以改元神爵五屬

甘露黃龍列為年紀蓋以感致神祇表彰德信是以

化致昇平稱為中興今天下清寧靈物仍降陛下情

存損挹推而不居豈可使祥符顯慶沒而無聞宜令

太史撰集以傳來世帝不納嘗自謙無德每郡國所

上輒抑而不宣故史官罕得記焉

明帝永平六年二月王維山出寶鼎 維或作雄 廬江太守

獻之四月甲子詔曰昔禹收九牧之金鑄鼎以象物

使人知神姦不逢惡氣 夏禹之詩令遠方圖畫山川奇異之物使九州之牧貢金

鑄鼎以象之令人知鬼神百物之形狀而備之故人入山林川澤魍魎魍魎莫能逢之惡氣謂魍魎之類

事見左傳 遭德則興遷於商周周德既衰鼎乃淪亡 史記周

鼎亡入泗水中秦始皇過戎欲出周鼎於泗水使千人没水求之不得 祥瑞之降以應

有德方今政化多僻何以致茲易曰鼎象三公易曰鼎拆

足覆公餗 豈公卿奉職得其理邪太嘗其以祲祭之日禮記

曰夏祭周以祲薄也夏物未成祭尚薄 陳鼎於廟以備器用

十一年灤湖出黃金廬江太守以獻灤湖湖名今在廬州合肥縣東

南時麒麟白雉醴泉嘉禾所在出焉

十七年正月甘露降於其陵是歲甘露仍降樹枝內

附芝草生殿前神雀五色翔集京師

章帝建初四年甘露降泉臨洮陽二縣二縣屬零陵郡

五年零陵獻芝草有八黃龍見於泉陵見零陵泉陵湘水中相與

戲其二大如馬有角六枚大如駒無角

七年十月幸槐里岐山得銅器形似酒罇獻之又獲

白鹿於臨平觀

元和二年二月丙辰東巡狩己未鳳凰集肥城縣今屬太

山郡 辛未幸太山柴告岱宗有黃鶴三十從西南來經

祠壇上東北過於宮屋翱翔升降五月詔曰乃者鳳

凰黃龍鸞鳥比集兩郡或一郡再見及白鳥神雀其

露屢臻祖宗舊事或班恩施其賜天下吏爵人三級

九月詔曰鳳凰黃龍所見亭部無出二年租賦鳳皇見肥

城句窳亭槐樹上古今注曰黃龍見雒陽元延亭部

丹元集符瑞一 卷之二十二
三年正月車駕北巡以太牢祠北嶽山見黃白氣有神魚躍出十數

章和元年七月詔曰乃者鳳凰仍集麒麟並臻甘露宵降嘉穀滋生芝草之類歲月不絕今改元和四年為章和元年自元和二年以來至章和元年凡二年麒麟五十一鳳凰百三十九黃龍四十四青龍白龍神鳥神馬白虎二十九白燕白兔赤鳥三足鳥白雀九尾狐木連理嘉禾華平朱草芝英白雉並見郡國帝在位十三年郡國所上符瑞合於圖書者數百千所

和帝時前後符瑞八十一所自稱德薄皆抑而不宣

安帝元初三年正月東平陸兖州縣名上言木連理三月

東平陸有瓜異處共生八瓜同蒂

延光元年八月九真言黃龍見無功無功縣屬九真郡

二年六月九真言嘉禾生百五十六本七百六十八穗

三年二月濟南上言鳳凰集臺縣丞霍收舍樹臺縣屬濟南

南郡故城在濟州平陵縣北四月沛國言甘露降豐縣六月扶風

言白鹿見雍七月馮翊言白鹿見其露降潁陽潁

川上言木連理白鹿麒麟見陽翟八月潁川上言麒

麟一白虎二見陽翟九月濟南上言黃龍見濟南歷

城十月新豐上言鳳集西界亭十二月瑯琊言黃龍

見瑯琊諸縣諸縣名

四年正月東郡言黃龍二麒麟一見濮陽

桓帝建和元年二月黃龍見沛國譙五月芝草生中

黃藏府中黃藏府中藏幣 帛金銀諸貨物也

二年四月嘉禾生大司農帑藏七月河東言木連理

又有嘉瓜兩體共蒂

元嘉元年四月白鳥見商國十一月鳳凰見濟陰

二年八月濟陰言黃龍見句陽金城言黃龍見允街

永興元年二月張掖言白鹿見

二年四月光祿府吏舍夜壁下有青氣得玉鉤玦各

一鉤長七寸三分玦周五寸四分身中皆雕鏤

永壽元年四月白鳥見齊國

延熹三年四月上郡言甘露降

九年四月濟陰東郡濟北平原河水清

永康元年八月魏郡言嘉禾生甘露降巴郡言黃龍

見十一月西河言白兔見一云白雉

靈帝熹平五年沛國言黃龍見譙

光和四年二月郡國獻芝英草七月河南言鳳凰見

新城羣鳥隨之

魏文帝黃初元年十一月受漢禪柴於繁陽有黃鳥
啣丹書集於尚書臺於是改元為黃初是月九尾狐
見甄城又見譙郡國十九言白鹿及白麋見郡國三
十七言甘露降郡國三言嘉禾生郡國十九言白雀
見郡國十九言白鳩見郡國二言木連理朱草生文
昌殿側郡國二言醴泉出神龜出於靈池鑊中生赤
魚四月冬甘露降芳林園

明帝太和元年四月雒邑初營文昭甄后廟握地得
玉璽方一寸九分其文曰天子羨思慈親明帝為之
改容以太牢告廟

景初元年正月荏縣言黃龍見

高貴鄉公甘露元年五月鄴及上谷並言甘露降於
是改元

陳留王咸熙元年安彌福祿縣各言嘉禾生

二年二月胸臆縣獲靈龜以獻四月南深澤縣言甘
露降

晉武帝太和元年十二月鳳凰六青龍二麒麟各一

見于郡國黃龍見雒濱白龍二見太原郡木連理生

遼東方域白虎見河南陽翟又見弘農陸渾

二年正月白虎見遼東樂浪又見天水西六月嘉檮

一蒂十實生酒泉八月木連理生河南成臯是年鳳凰六青龍十黃龍九麒麟各一見于郡國

三年正月白龍二見于弘農四月張掖太守焦勝上言氏池縣大柳谷口見有玄石一所白晝成文實大晉之休祥圖之以獻詔以制幣告于太廟藏之天府五年正月青龍二見滎陽二月白龍見於趙國五月鳳凰見於趙國七月白兔見北海卽墨長獲以獻六年四月白龍二見于東莞

七年六月東宮玄圃池芙蓉二花共蒂皇太子以獻八年正月木連理生東平范陽五月白鳩二集太廟

南門議郎董胃獲以獻是月木連理生東平壽張十月木連理生建寧白鹿見扶風雍州刺史嚴詢獲以獻是月瀘水胡王彭護獻嘉禾

十年四月甘露降西河離石

咸寧元年正月木連理生汝陰南頓四月白驢見瑯琊趙王倫獲以獻是月甘露降張掖白雉見安豐松陽五月甘露降清河繹幕九月甘露降太原晉陽十月白雉白雀見梁國睢陽梁王彤獲以獻

二年四月木連理生清河五月甘露降玄菟郡治六月木連理生燕國十月黃龍二見於漢嘉靈關白兔

二見河南陽翟陽翟令華衍獲以獻十一月白龍二見於梁國

三年二月白虎見沛國七月白麀見魏郡是月木連理生始平鄠十一月白雉見渤海饒安相阮溫獲以獻

四年六月白兔見天水八月木連理生陳留長垣五年二月白麟見於平原鬲縣六月甘露降巴郡南充國七月白鳥見於南陽太守獲以獻九月麒麟見河南陽城十一月青龍見京兆霸城是年木連理生義陽又生樂安臨濟

太康元年正月木連理生涪陵永平三月白鹿見零陵泉陵四月木連理生頓丘是月白麟見於頓丘五月白鹿見天水西縣太守劉辛獲以獻又白鳥見襄城木連理二生濟陰乘氏沛國七月白鹿見零陵零陵令蔣微獲以獻是月木連理生馮翊粟邑八月白鹿見永昌南平又白龍三見于永昌九月白雉見中山

二年正月木連理生滎陽密六月白雀二見河內太守阮佃獲以獻是月白雀二見河南河南尹向雄獲以獻七月白雉見太僕寺八月白兔見彭城十月白

兔見趙國平鄉趙王倫獲以獻是月木連理十三生
南安源道

三年四月木連理生瑯琊閏四月白龍二見于濟南
歷城六月嘉瓜異體同蒂生河南雒陽輔國大將軍
王濬園是月木連里生廣陵海西八月白麇見梁國
梁相解隆獲以獻

四年正月木連理生馮翊臨晉蜀郡成都七月白虎
見建平十一月白兔見北地富平十二月嘉禾生扶
風雍是月白鳩見安定臨涇是月木連理生扶風
五年三月甘露降東宮七月嘉禾生豫章南昌九月

白麇見義陽

六年八月白龍見于京兆陰槃

七年三月木連理生河南新安四月甘露降京兆杜
陵五月白麇見汲郡是月甘露降魏郡鄴六月木連
理生南鄉范陽七月白雀見豫章

八年閏三月嘉禾生東夷校尉國四月木連理生廬
陵東昌八月白雀見河南雒陽九月嘉禾生東萊掖
是月木連理生東萊盧鄉十二月白兔見陳留酸棗
關內侯成公忠獲以獻

九年九月木連理生陳留浚儀十二月青龍黃龍各

丹月元瑞符瑞一
卷之二十一
一見于魯國

十年五月白兔見京兆長安是月白雀見宣光北門
華林園令孫邵獲以獻六月嘉麥生扶風郡一莖四
穗是歲收三倍十月白虎見犍爲十一月木連理生
鄱陽鄡鄉是年白鳩見河南城

太熙元年二月木連理生河南梁

惠帝元康元年四月白鳥見河南城臯縣令劉機獲
以獻五月白鳥見梁國睢陽是月木連理三生成都
臨邛七月白燕二見酒泉福祿太守索靖以聞是月
白鳥見陳留獲以獻是月梁國內史任式上言武平

界有柞櫟二樹合爲一體連九月白鹿見交趾武寧

四年五月甘露降樂陵郡十月白兔見鄱陽

七年三月成臯縣獄有龍升天

愍帝建興元年六月甘露降西平縣八月嘉禾生襄
平縣一莖十穗

二年三月木連理生朱提是月木連理生益州雙栢
六月木連理生襄平是月嘉禾生平州治三實同蒂
九月麒麟見襄平刺史崔毖以聞十月大將軍劉琨
掘地得玉璽使叅軍郎碩奉之歸于京師

三年四月赤雀見平州府倉七月嘉禾生襄平異體

同蒂八月甘露降新昌縣十一月白雉見襄平

元帝建武元年三月丹陽江寧民虞由懇土得白麒

麟璽一紐文曰長壽萬年四月尚書僕射刁協獻白

雀五月白鹿見高山縣六月甘露降壽春閏六月木

連理生高山縣八月木連理生汝陰十一月木連理

生武昌是月木連理生汝陰太守以聞

大興元年正月麒麟見豫章七月木連理生武昌

三年正月白鹿二見豫章四月甘露降瑯琊費是月

白鹿見晉陵延陵十一月木連理生零陵

永昌元年九月白鹿見江乘縣

二年正月赤鳥見暨陽

明帝太寧二年正月巴郡言甘露降十一月白鳥見

京都

三年三月白鳥見吳郡海虞獲以獻群官畢賀

成帝咸和元年十月辛卯宣城春穀縣山岸摧獲石

鼎重二斤受斛餘

四年四月甘露降武昌郡閣前柳樹太守以聞五月

白鹿見零陵洮陽獲以獻七月長沙郡邏吏黃光於

南郡道遇白鹿驅之不去直來就光追尋光三百餘

步光遠抱取遣吏李堅奉獻

六年三月甘露降寧州城內北園桃榛樹刺史以聞
是年鎮西將軍庾亮獻嘉橘一帶十二實

七年四月甘露降京邑揚州刺史王導以聞

八年四月甘露降廬江襄安縣蔣胃家又降宣城宛
陵縣之須里五月麒麟騶虞見遼東白虎見新昌縣
是月木連理生昌黎

九年四月甘露降吳國錢塘縣石鄉康巷之柳樹五
月白鹿見吳國吳縣白鳶見吳國錢塘內史虞潭以
獻八月白鹿見長沙臨湘十二月甘露降建平陵又
降武平陵

咸康元年四月甘露降西堂桃樹

二年三月甘露降鬱林城內四月甘露降西堂又降
尚書都堂桃樹又降會稽永興山陰及吳興武昌七
月白鹿見豫章望蔡太守桓景獲以獻

三年三月木連理生平州世子府治故園中四月甘
露降殿後桃李樹五月甘露降義興縣陽羨里柞樹
東西十四步南北十五步

五年豫章南昌民掘地得銅鐘四枚太守褚裒以獻
七年四月甘露降彭城上紘第內眾官畢賀十二月
吳國內史王恬上言木連理生吳縣沙里

八年九月廬江春穀縣留珪夜見門內有光取得玉
鼎一枚外圍四寸豫州刺史以獻

穆帝永和元年二月春穀民得金券一枚長五寸狀
如鐵券明年桓溫平蜀三月廬江太守永上言於春
穀城北見水岸邊有紫赤光取得金狀如印遣主簿
李邁表送是月甘露降廬江郡內桃李樹太守永以
聞八月有白麀見吳國吳縣西界包山獲以獻

五年二月臨江太守藍田侯述言郡界木連理十一
月太嘗劉邵上崇平陵令王昂即日奉行陵內甘露
降于玄宮前殿十二月甘露降丹陽湖熟縣西界劉
敖墓松樹縣令王怡以聞衆官畢賀

八年十二月白麀見丹陽永世永世令徐該獲以獻
十二年九月白鹿見鄱陽太守王耆之獲以獻十一
月白麀見梁郡梁郡太守劉遂獲以獻

升平三年十二月北中郎將郗雲獻白兔

四年二月鳳凰將九雛見于豐城十一月鳳凰復見
豐城衆鳥隨之

五年二月南掖門有馬足出地得銅鐘一枚四月鳳
凰見於沔北

海西公太和元年四月陽谷獻白兔

簡文帝咸安二年正月甘露降隨郡聶陽縣界桑木
沾凝十餘里中三月騶虞見豫章

孝武帝康寧三年六月江寧縣建興里僑民李康家
有樹異本連理

太元三年七月乙酉老人星見南方

十年七月丁巳老人星見

十一年四月瑯琊費有榆木異根連理相去四尺九
寸八月白鳥集江州寺庭羣鳥翔衛

十二年八月甘露降寧州界內刺史費統以聞

十四年六月寧州刺史費統上言所統晉寧之滇池

縣舊有河水週迴二百餘里有神馬二疋一白一黑
出於河中去岸百步縣民董聰見之十一月白虎見

豫章郡

十五年三月白兔見淮南壽陽閏月甘露降永平陵

十六年三月白鹿見豫章望蔡獲以獻十一月甘露

降句陽縣是月白雀見南海增城縣民吳北屋

十七年二月甘露降南海番禺縣陽

十八年五月白鹿見江乘江乘令田熙之獲以獻十

月臨川東興令惠欣之言縣東南溪旁有白銀樹芳

靈樹李樹並連理

十九年正月華林園延賢堂西北李樹連理二月行
鞏令劉啓期行温令趙邳並言白虎頻見

二十年九月白鹿見巴陵清水山荊州刺史殷仲堪
以獻

二十一年正月木連理生南康寧都縣社後五月日
烏見吳國獲以獻

安帝隆安二年十月新野言騶虞見

二年武陵臨沅獻安石榴一蒂六實十一月木連理
生汝陽太守垣苗以聞

五年十一月襄陽言騶虞見于新野白雀見宜都是

月白鹿見長沙白麋見荊州刺史桓玄以聞

元興元年正月木連理生泰山武陽

二年十月甘露降武昌王成基家竹

三年三月甘露降丹徒四月甘露降蘭臺六月白雀
見豫章新塗獲以獻

義熙元年南康雩都高山有金雞青黃色飛集巖間
二年四月無錫壽陽並獻白兔

七年五月白雉見豫章南昌

十二年六月左衛兵陳陽於東府前淮水中得玉璽
一枚

冊府元龜

淮南李嗣京叅閱

西極文翔鳳訂正

豫章黃國琦較釋

帝王部

二十三

符瑞第二

後魏道武登國六年十二月帝獵親獲鹿一角召問羣臣皆曰鹿當二角今一角是諸國將并之應也

皇始元年十一月黃星又見

先是有大黃星出於昴畢之間

天興二年七月并州獻白兔是月并州獻白雉是月

獲嘉禾於平城縣異莖同穎八月廣寧送嘉禾一莖
十一穗平城南十里郊嘉禾一莖九穗告于宗廟
三年四月有木連理生于代郡天門關之路左五月
東巡狩廣寧有白兔見于乘輿前獲之八月渤海菑
縣東光縣木連理各一十二月豫州上言木連理生
於河內之郡縣

四年正月并州獻白兔是月上黨郡獻白雉

三年正月渤海上言東光縣木連理是月渤海郡高
城縣獻白雉三月渤海郡南皮縣獻白雉二六月頓
丘郡獲白兔八月嘉禾生於渤海郡東光縣是月廣

寧郡上言木連理十一月中山行唐縣獻白雉

四年正月新興郡獻白雉十二月又獻白雉二

五年白雉見於河內郡

七年九月溫泉出于涿鹿人有風寒之疾入者多愈

八年五月鴈門獻白雀

太武始光三年五月雒州獻黑兔

四年六月甘露降于太學

神麋元年二月定州獲白麋鹿白麋鹿又見于樂陵
囚以改元是月相州獻白雉是月甘露降于范陽郡
九月章武郡獻白兔是月滄水郡獻白雀十月魏郡

獻白兔

三年二月上黨郡獻白雉四月甘露降于鄴六月甘露降於平城宮七月嘉禾生於魏郡安陽縣三本同

穎

三年二月白鹿見於代郡倒刺山三月甘露降于鄴七月冀州獻白龜

四年二月渤海郡獻白兔九月滎陽郡上言木連理五月甘露降於河西

延和二年三月樓煩南山木連理

三年三月樂安王範獲玉璽一文曰皇帝璽以獻

月上谷郡上言木連理

太延元年二月魏郡上言木連理

四年十二月相州獻白鹿

五年二月遼西上言木連理

太平真君元年四月甘露降于平原郡

二年七月天有黃光洞炤議者僉謂榮光也

七年二月青州獻白兔四月戊子毀鄴城五層佛圖

於泥像中得玉璽二其文皆曰受命於天既壽永昌

其一刻其旁曰魏所受漢傳國璽

八年五月鴈門郡獻白雀是月雒州送白鹿

文成興安二年六月營州送大龜

興光元年二月有雲五色所謂景雲太平之應也

太安二年七月甘露降於常山郡十月白鹿見于京

師西苑

三年三月有白狼一見於太平郡

議者古今瑞應多然白狼見於成湯之世故殷道用興太平嘉名也又先帝本封之國而白狼見焉無窮之徵也

和平二年七月甘露降于京師

三年四月河內人張超於懷樓新城北故佛圖處獲

玉印以獻印方二寸其文曰富樂日昌永保無疆福

祿日英長壽萬年玉色光潤模制精巧百僚咸曰神

明所授非人爲也詔天下大酺三日十月雲中獲白

兔

四年閏月鄴縣獲白兔三月冀州獻白雉

孝文延興元年十一月秘書令楊崇奏鍾律郎李生

於京師見長生連理樹是月泗州秀容民獲麟以獻

十二月徐州竹邑戍士邢德於彭城南一百二十里

得著一株四十九枝下掘得大龜獻之詔曰龜著與

文相合所謂靈物也德可賜爵五等

二年正月青州獻白雉二月白雉見於扶風郡四月

幽州獻白鵠

三年五月白雀見於代郡六月京師獲大龜

四年正月青州獻白雀九月白雀見中山

五年正月白雉見於上谷郡四月白兔見於代郡

承明元年六月秦州獻白鹿八月白鹿見於雲中是

月齊州獻嘉禾是月上谷郡民獻玉印上有蛟龍文

是月定冀二州俱獻白鵲九月京兆民獻青玉璧一

雙文色炳煥是月并州上言木連理相去一丈二尺

中有五枝相連十一月定州獻白鵲是月冀州獻白

鳩

太和元年正月白鹿見於秦州青州二月秦州獻白

雉三月白雉見于秦州是月白鹿見於秦州是月武

川鎮玉印青質素文其文曰太昌是月冀州上言木

連理六月雍州周城縣獻白兔是月雍州獻玉印又

長安鎮獻玉印一上有龜紐下有文字色甚鮮白有

殊嘗玉十一月白雉見於安定郡

二年三月白鷺見於并州七月白鳥見於涼州九月

有鼎出於雒州澗雒水送於京師是月白鳥見於京

師十一月徐州獻白雉是月雒州獻白鵲是月徐州

獻黑狐是月秦州獻五色狗十二月懷州獻白麀

三年正月統萬鎮獻白雉三月齊州獻五色狗其色

如畫是月吐京鎮獻黃兔是月泗州獻一角鹿是月
白鳥見於豫州五月獲白狐五月白麀見於豫州是
月白雀見於豫州六月撫冥鎮獲白狐以獻七月定
州鉅鹿民獻玉印二方七分上有文字九月齊州獻
嘉禾是月白鳥見於秦州十月徐州獻嘉瓠一蒂而
實

四年正月南豫州獻白雉是月南豫州獻白鹿

五年六月上邽鎮將上言於鎮城西二百五十里射
獵於營南千水中遂得玉車釧三枚二青一赤制狀
甚精八月嘗山獻嘉禾

六年三月豫州獻白雉

七年六月青州獻三足鳥是月定州獻嘉禾

八年正月上谷郡惠化寺醴泉涌四月白鷺集于京
師是月代郡獻白鷺六月徐州獻白兔是月徐州獲
黑鳥以獻是月齊州清河郡獻白雉

十年三月冀州獲九尾狐以獻

十一年十一月冀州獲九尾狐以獻

十二年正月司州河州各獻白狐狸是月清河武城
縣獻口雀十一月滎陽獻三足鳥

十四年六月懷州獻三足鳥

十七年正月幽州獻白雉四月瀛州獻白雉五月冀州獻三足鳥六月京師木連理是月兖州獻白鳥
十八年十月河南上言鞏縣木連理是月瀛州獻白兔

十九年六月司州平陽郡獲白鳥以獻七月司州獲白鹿麇以獻

二十年二月交州獻白雉六月司州獻白鹿是月豫州獻三足鳥

二十一年七月汲郡獻黑兔是月京師獲白兔

二十三年正月華州獻白麇二月涼州獻赤鳥六月

冀州獻三足鳥七月瀛州獻白鳩八月滎陽郡獻白

鳩九月荊州獻白鷺閏月正平郡獻白鷺十月并州

上言百節連理生懸甕山濟州上言木連理十二月

瀛州上言木連理是月司州獻白鳥是月獲黑兔

宣武景明元年四月荊州獻白鹿五月徐州獻三足

鳥七月齊州獻嘉禾十一月河州獻白兔

二年正月瀛州上言平野縣木連理六月有雲五色

見於申酉之間十二月南青州獻蒼鳥

三年正月潁州郡上言木連理是月徐州獻白雉三

月冀州獻白雉是月豫州獻三足鳥是月平陽郡上

言襄陵縣木連理是月河州獻白狐三月濟州獻赤
雀四月荊州上言南陽縣木連理是月潁州郡獻白
兔六月滎陽郡獻白雀是月涇州獻白鸞是月徐州
上言東海木連理七月濟州獻嘉禾是月魯陽獻烏
芝是月涇州獻白鳩八月甘露降於青州新城縣是
月河內郡獻白兔十月秦州上言南稻新興二縣木
連理各一是月薄骨律鎮獻白雀

四年二月趙平郡上言鶉觚縣木連理三月濟郡上
言臨淄縣木連理是月燉煌獻白雀四月汾州上言
五城郡木連理五月京師獲白雀是月青州上言莒

縣木連理是月獲赤雀於京師六月幽州獻四足烏
是月嘗農盧氏縣木連理是月徐州上言梁郡下邑
縣木連理是月嘗農郡獻白雀是月河內郡獻白兔
七月京師獻白雀是月夏州獻黑兔八月嘉州獻嘉
禾九月秦州上言當亭四縣界木連理各一
正始元年二月冀州獻三足烏三月河內郡獻黑兔
四月魯陽郡獻白兔五月司州上言滎陽京縣木連
理是月幽州獻三足烏是月相州獻三足烏六月京
師西苑木連理是月定州獻三足烏七月河東郡上
言聞嘉縣木連理八月濟州獻嘉禾是月河南郡上

言慈水濱木連理十月嘗農郡嶠縣木連理是月京師獲白鳩又建興郡獻白鳩十二月涼州上言石城縣木連理

二年正月汾州上言平昌縣木連理二月司州上言嶠縣木連理四月并州獻白鳩五月司州獻白鳥是月泗州獻三足鳥是月雍州獻蒼鳥六月濟州獻嘉禾是月雍州獻蒼鳥七月冀州獻白鳩二是月魯陽郡獻嘉禾是月薄骨律鎮獻白雀八月司州獻嘉禾是月東郡獻白兔九月後軍將軍爾朱新典獻一角獸是月司州上言潁川陽翟縣木連理是月河內郡

獻黑兔是月泗州獻白兔東郡獻白兔

三年三月濟州獻白雉是月豫州獻三足鳥豫州又獻三足鳥四月獲白雀於京師六月汾州上言衣安縣木連理是月京師木連理七月潁川陽翟縣上言木連理是月建德郡上言石城縣木連理是月薄骨律鎮獻白兔是月冀州獻嘉禾是月夏州獻白鳩九月泗州獻白兔是月潁州獻白鳥十月河州獻白雀是月青州獻白雉十二月雍州獻白雀四年二月豫州獻白雀四月河內郡獻白兔七月潁州獻白鳥十一月秦州獻白雉

永平元年四月瀛州民獲玉卮各以獻四月京師獲赤雀是月豫州獻三足鳥是月潁川獻白鳥是月齊州獻白兔是月有司上言潁川郡木連理五月河內獻黑兔六月雒州獻白鳩十月甘露降於青州益都縣是月樂安郡獲白兔

二年二月相州獻白兔四月河內郡獻白雉是月河內郡獻蒼鳥是月司州上言嘗農北陝縣木連理六月河南獻白雉十二月豫州獻白雉

三年七月京師獲白雀八月滎陽獻嘉禾十月白豨見於汲郡十一月夏州上言橫風山木連理

四年八月平州獻白鹿

延昌二年正月徐州上言建陵城木連理五月齊州獻白鹿八月平陽郡獻白鳥

三年正月司州上言軹縣木連理六月冀州獻白鳥七月豫州獻白兔是月河內郡獻白雀十一月秦州獻白雀

孝明以延昌四年正月卽位二月冀州獻白雉二月豫州獻三足鳥是月京師獲白雉三月冀州上言信都縣木連理是月河南獻白兔四月兗州獻白狐五月滎陽獻白雀六月司州獻白鹿是月京師木連理

八月河南獻白兔是月秦州獻白雀是月青州獻白雀九月雍州上言鄠縣木連理是月河南獻白兔是月嘗州獻白雀是月雒陽獲白雀是月相州獻白狐十一月荊州獻白雀十二月幽州獻白雉閏月汾州獻白狐二是月岐州獻白雉

熙平元年正月光州上言曲城縣木連理是月定州獻白雀二月赤鳥見泗州秀容郡是月相州獻白雉三月泗州獻白雉四月汲郡獻三足鳥是月京師再獲白雀五月濟州獻白鹿六月冀州獻蒼鳥七月宮中獲白雀是月京師獲白鸞十一月泗州獻一角獸

二年正月金出岐州橫水縣赤粟谷三月徐州獻白鰲是月徐州獻白雉四月東郡獻三足鳥是月豫州獻三足鳥兖州又獻三足鳥是月豫州獻白兔是月華州獻白雀五月司州獻白鹿是月東郡獻白兔六月相州獻白雀是月薄骨律鎮獻白雀是月京師獲白兔七月京師獲白雀八月薄骨律鎮獻白雀又京師獲白雀是月幽州獻嘉禾三本同穗九月汲郡獻白鳩十一月京師獲白雀是月鄆善鎮獻白兔是月京師木連理八月正平郡獻白兔九月正平郡又獻白兔是月徐州獻一角獸十月京師獲黑兔

三年二月涼州上言榆中縣木連理三月青州上言平昌郡木連理七月京師獲白雀

四年二月揚州上言汝陰縣木連理八月涼州上言顯美縣木連理

正光元年正月徐州獻白兔四月濟州獻三足鳥是月濟州又獻三足鳥五月冀州獻白兔是月并州上言上黨東山谷中木連理六月京師獲白雀十月幽州獻白鳥十一月濟州上言濟南郡靈壽山木連理二年三月南青州獻白狐二閏月東郡獻三足鳥六月光州獻白雀是月濟州上言魏郡逢陵縣木連理

七月朔州獻嘉禾

三年二月夏州獻白雉是月涼州上言榆中縣木連理三月青州上言平昌郡木連理

四月京師獲白雀五月徐州獻白兔二又冀州獻白兔一是月東郡獻三足鳥潁州郡許昌縣獻三足鳥泗州獻三足鳥六月冀州獻三足鳥是月滎陽郡獻白雀是月平陽郡獻白狐是月并州靜林寺僧在陽邑城西橡谷掘藥得玉璧五珪十玉卽一玉柱一玉蓋一並以獻八月光州獻九尾狐是月泗州獻嘉禾一根生六穗是月濟州獻白雀是月光州獻白雀是

月徐州上言龍亢戍東木連理九月白雀見舍人省
十月甘露降華林園栢樹

四年正月京師獲白鵲二月楊州上言汝陰縣木連
理三月光州獻白雉五月平郡獻白狐六月瀛州獻
三足鳥是月京師獲白雀七月京師獲白雀八月涼
州上言顯美縣木連理是月甘露降顯美縣

孝昌元年十月魏郡元城縣木連理

三年四月河南獲赤雀以獻

前廢帝普泰元年五月河內獻蒼鳥

出帝太昌元年四月京師獲白雀六月初出有大

黃氣成抱

後周閔帝元年正月辛丑卽天王位是日槐里獻赤
雀二月秦州涇州各獻木連理五月魏里獻白鷺
明帝元年三月長安獻白雀六月長安獻白鳥七月
順陽獻三足鳥羣臣上表稱慶詔曰夫天不愛瑤地
稱表瑞莫不威鳳巢閣圖龍躍沼豈直日月珠連風
雨玉燭是以鈞命決曰王者至孝則出元命苞曰人
君至治所有虞舜蒸蒸降茲異祉周文翼翼翔此靈
禽文考至德下覃遺仁爰被遠符千載降斯三足將
使三方歸本九州翕定惟此大禮景福在民予安敢

攘宗廟之善弗宣大惠可大赦天下文武官並進二級

二年十月長安獻白兔

武成元年四月戊午武當郡獻赤鳥秦州獻白馬朱鬣

武帝保定元年二月弘農上言九尾狐見五月晉公護獲玉斗以獻

二年四月南陽獻三足鳥湖州上言見二白鹿從三角獸而行十二月益州獻赤鳥

三年二月滑州獻三足鳥三月益州獻三足鳥九月

蒲州獻嘉禾異畝同穎

五年郢州獲綠毛龜九月益州獻三足鳥十一月岐州上言一角獸見

天和元年四月益州獻三足鳥

二年三月巳卯皇太子於岐州獲二白鹿以獻六月襄州上言慶雲見七月辛丑梁州上言鳳凰集於楓樹群鳥列侍以萬數

五年七月益州獻白兔

建德元年九月扶風掘地得玉杯以獻

三年五月荊州獻白鳥十月雍州獻蒼鳥十二月利

丹元龜符端二
州上言騶虞見

六年六月應州獻芝草八月甲子定州獻九尾狐皮
肉消盡骨體猶具九月甲申絳州獻白雀

隋高祖開皇元年二月甲子卽位是月京師慶雲見
三月高平獲赤雀太原獲蒼鳥長安獲白雀各一宣
仁門槐樹連理衆枝內附又蓋屋縣連理樹植之宮
庭

三年二月涇陽獲毛龜京師醴泉出

四年正月渝州獲獸似麋一角同蹄

十五年七月晉王廣獻毛龜

煬帝大業四年五月蜀郡獲三足鳥張掖獲玄狐各

一

册府元龜

帝王部

